

## Guijtz Ganid Lo Timoteu

### *Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. <sup>2</sup> Timoteu, luj najclu si'cpac xingänä lo yälirililajz. Xtadnu Dios näjza Xtad Jesucristnu gacnäjlu, gulaslajzreni luj, guscuedxireni lastoolu.

### *Pabl ruliidx xcuent reni ruluii diidx-xhii*

<sup>3</sup> Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, <sup>4</sup> te na'c jutejreni rexcuent rebentemp, te na'cza jiuduxhreni chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Najrnibeä si'c chanuu gulijdxlu rebejn.

<sup>5</sup> Ruliidxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. <sup>6</sup> Yu'reni abaro'n rediidxre, riejytis ro'reni saniduxhreni diidx ni xhet sajcdi. <sup>7</sup> Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni. <sup>9</sup> Najnnu di leii gac par bensa'c, najcni par reni najc benlatsiaj ni di jiu leii xten Dios, näjza reni di gusoob diidx; par

reben̄ guijdx, nājza reben̄doj̄l; par reni di jiu Dios, nājza reni rusguee; par reni rugu't xtadni, xnanni, nājza guiraa reni rugu't bejn̄; <sup>10</sup> par reni resnāj te gunaa ni digac chääłreni, nājza reni resnāj lagajc saniguiireni; par reni rbajn̄ bejn̄; reni rnii didx-xhii; reni rnii didx-xhii si'c didxle' parsi rusguee sa'reni; nājza bejn̄ ni rujn̄ xhitis xhi xtee dzuun ni digac dzunsa'c, <sup>11</sup> nalajznu sa' redzunsa'c ni rulijdx xtidx Dios-le', diidx ni rusłaa lo doj̄l. Narä biannää diidxre.

*Rudeedni xquixtios lo Dios sa'csi rulaslajznini*

<sup>12</sup> Rdedä xquixtios lo Dad Jesucrist ni runiidx yäl̄rnibee narä sa'csi najnni nasobdidxä, ni'cni guleni narä gunä xtzuunni. <sup>13</sup> Luxh galoo guniyaāni, birinalä xpejn̄ni, basacsíäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. <sup>14</sup> Niluxh lacti guroob gujc yäl̄racnāj xte Xtadnu, guideb yäl̄rililajz, nāj yäl̄sanälajz ni rajp Jesucrist.

<sup>15</sup> Diidxre najc guliduxh, nanab chalilajz pactuni: Jesucrist biäd lo guedxliujre te gusłaaani reben̄ doj̄l; lo reben̄ doj̄l narä nacäru ben̄dolduxh. <sup>16</sup> Ni'cni balaslajz Dios narä, mase nacä ben̄dolduxh lo guiraareni, te ganid con narä guluini xho rbäjz Jesucrist te chalilajz bejn̄ xtiidxni, te filoj reni churu chalilajz xtiidxni te ga'preni yäl̄nabajn̄ par tejpas. <sup>17</sup> Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni col̄guiliä'p xpala'nni, col̄gaj̄n̄ni guideb guibaj̄ntu nājza par tejpas. Si'c gacni.

<sup>18</sup> Xi'nä, Timoteu, dee najc yäl̄rulijdx ni runidxä lojlu te gucuasa'clu si'c te soldaad ni abisieed,

sigajc ni gunii reprofet xcuentlu galoo. <sup>19</sup> Di gunijtlu yälirililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälirililajz. <sup>20</sup> Si'c gusajc Himeneo näj Alejandro, luxh abatedäreni ladznäa bendxab te guisieedreni na'c guiniya'reni Dios.

## 2

### *Ruluiini xho guiniabreni lo Dios*

<sup>1</sup> Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn. <sup>2</sup> Guiniabzalu xcuent rereii näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnu. <sup>3</sup> Sa' yälrniabga najc laaca, luxh si'c rdxagljaz Dios ni rusläa nurnu lo dojl guiniabnu lojni. <sup>4</sup> Dios rljaz läa guiraa bejn lo dojl, rljazzani gacbeepacreni xtidxliini. <sup>5</sup> Yu' tejtis Dios, näjza tejtisza nani rusiäl diidx lo Dios näjza loj reben guedxliuj. Laani najc Jesucrist ni gujca niguii. <sup>6</sup> Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios. <sup>7</sup> Dios gule narä te gacä apost te gusule'ä xtiidxni, yälirililajz näjza didxlii lo reni di gac xpejn Israel. Si'c ni rljaz Jesucrist rniä didxlii, dina guiniä diidx ni rusguee.

<sup>8</sup> Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni biey. <sup>9</sup> Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejcn te guidxeloj

bejnreni. <sup>10</sup> Masru ruchaag gunreni si'cni rchalglajz Dios, si'c riäjł gun guiraa regunaa ni yu' lo Dios. <sup>11</sup> Riäjł dxitis gucuadiajg regunaa xtidx Dios ni rusule' reniguii. <sup>12</sup> Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuadiajg diidx nani cagusule'ni. <sup>13</sup> Sa'csi ganid benchee Dios Adán, dxejctiru bencheeni Eva. <sup>14</sup> Luxh et Adandi basguee beñdxab, beñdxab basguee gunaaga, dxejc biajbni nen dojl. <sup>15</sup> Niluxh siliaa regunaa, palga jiureni xtzuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

### 3

#### *Xho riäjł gac reni rnibee*

<sup>1</sup> Dee najc didx gulii: palga rlajz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlajzni gunni. <sup>2</sup> Ni'cni, ni rlajz gac nani rnibee, riäjł guibañsa'cni te na'c chu xhicuent guiniyaj rebejnni. Riäjł gacni chääl tejtis gunaa, riäjł susinni, gacni te beñsa'c, cuedxini, te guibañsa'cni. Riäjłza di gudxojnni rolijzni guidzujñ bejn, nägajc riäjł gacni te bejn ni nansa'c te guluiini. <sup>3</sup> Na'c gacni te beñgu, nicla te ni rdxagdił bejn, na'cza gacni te nani rsia' lajzni ga'pni xhidajł meel, riäjł cuedxini lajzni, na'c chanälajzni meel. <sup>4</sup> Riäjł guinibesa'cni rolijzni, saru gunni te gusoob rexi'nni xtiidxni. <sup>5</sup> Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. <sup>6</sup> Di riäjł guinibee te beñcoob nani entis huililajz, te di guschä'pni

xpala'nni sas jiajbni lo lagajc xcälñaj Dios ni biajb beñdxab. <sup>7</sup> Luxh riäjłza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzñaa beñdxab.

### *Xho riäjł gac reni rcanäj nen guidoo*

<sup>8</sup> Si'cza rediaconos riäjł gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni ni-unsac gaan. <sup>9</sup> Riäjł gapdzu'tzni rediidx nagajn xten yälřililajz, ni'c nanab gac naya las-tooreni. <sup>10</sup> Riäjł fixgaatu xho nabajñreni. Palga nabansa'creni, rutza gacdi gucuaquijdireni, sajc gacreni diacono. <sup>11</sup> Regunaa ni rłajz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. <sup>12</sup> Riäjł gac rediacono chääl tejtis gunaa. Riäjł guinibesa'cni rexi'nni näj guiraa reni yu' rolizni. <sup>13</sup> Sa'csi rediaconos ni runsa'c xtzuunni, sanälajz bejnreni, dizareni guidxejb rsiudzu'tz las-tooreni lo xcälřililajz xtidx Jesucrist.

### *Gurobduxh najc yälřhiga'tz xten Jesucrist*

<sup>14</sup> Cacuaä diidxre lojlu, niluxh rłazä jädhuigaä la'tu. <sup>15</sup> Luxh palga gaclaä, anajnlu xho riäjł guibajñ bejn roliz Dios, nalajznu xquidoo Gueb Dios ni nabajñ par tejpas. Guidoore rniaszdu'tz näjza ruluiiru didxlii xten Dios. <sup>16</sup> Rdxeloyaduxh guralii bejn yälřhiga'tz xten xcälñajn Dios: Dios biääd lo guedxliuj si'c te beñgedxliuj, Sprit Dxan xten Dios gunii beñdxanni; bahuii rexangl Dios lojni;

basule'reni xtiidxni lo rebejn ni di gac xpejn Is-  
rael;  
guira lajt huililajz bejn xtiidxni;  
huäjsni lo xcälrdimbicha' Dios xhaguibaa.

## 4

### *Reni rbicaj lo xnezyuj Dios*

<sup>1</sup> Aguniipac Sprit Dxiän siääd redxej che chu reni guro'n yälirililajz, sucuadiajgreni xtidx rebejn ni rusguee näj xtidx rebejdxab, <sup>2</sup> niela jiu'reni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxuuj te guiblaa: xhetru racheedini. <sup>3</sup> Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rililajz, ni racheeza didxlii, te gudeedreni xquixtios lo Dios. <sup>4</sup> Guiralii reni benchee Dios najc laaca, di riäjäl cuälaznu xhi rca'nu che rudeednu xquixtios loj Dios. <sup>5</sup> Sa'csi xtidx Dios näj yälrbedx-rniab lo Dios runsa'c guira'ti.

### *Te ni runsa'c xtzuun Jesucrist*

<sup>6</sup> Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälirililajz, näj yälrluisa'c ni sanuulu. <sup>7</sup> Na'c jiulu ni rni regunaroyeii ni xheti xtzuunni. Bisieed sudzu'tz lastoolu lo xtidx Dios. <sup>8</sup> Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yäl'nabajnre näjza lo yäl'nabajn ni najc par tejpas. <sup>9</sup> Dee najc didxlii, riäjäl chalilajz

guiraatuni. <sup>10</sup> Ni'c riennu dzuun, rdeednu trabajw, sa'csi cabäjznu Gueb Dios ni nabajn, ni rusläa bejn lo dojl, ganiddoo renani rililajz xtiidxni.

<sup>11</sup> Sajplu guinibeelu soob rediidxre, näjza guluilu rediidxre. <sup>12</sup> Di gusaanlu cuälazreni luj sa'csi najclu bi'n; riäjł gaclu te ni suu te fi guiraa reni rililazsa'cpac xho rniilu, xho nabajnlu, xho sanälajzlu sa'lu, xho rililajzlu, näjza xho rajplu xhigabsa'c. <sup>13</sup> Lał ni guidzunä ro'c, bil xtidx Dios lo rebejn, balijdxreni, baluiiza xtidx Dios lojreni. <sup>14</sup> Di gusaanlu reyälñajn ni baniidx Dios lojlu cheni basuj rebengool ñaareni yejclu por xtidx Dios, guniireni diidx xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fi guiraareni xho sanuulu lo xtidx Dios. <sup>16</sup> Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuadiajg xtiidxlu.

## 5

### *Xho guibannäjnu reni rililajz*

<sup>1</sup> Na'c quidxa'lu loj te bengool; guninäjni si'c xtadlu, balijdx rebi'n si'c bejtzlu, <sup>2</sup> balijdx renanbengool si'c xnanlu, balijdx redxap steeb si'c rebisiajnlu con rexhigabsa'c.

<sup>3</sup> Gucnäj rebiuud ni guliipac rquiin chu gacnäjreni te chu xhi gaureni. <sup>4</sup> Niluxh palga yu' chu biuud yu' xi'nni o xajgni, suguisiedxgaareni guibanayareni lo xnez Dios, te quiixreni di'n ni nasääbreni lo xtadreni, näj xnanreni ni baslaareni, sa'csi ni'c najc laaca, rdxagljazza Diosni. <sup>5</sup> Gunaa ni najcpac biuud, abia'n xtebni, ni'c rbäjztisni lo

Dios, dxej-yääl rbejdx-rniabni lo Dios. <sup>6</sup> Niluxh biuud ni nabajñ cadedgustisni najc si'c te ni agujt neñ dojl. <sup>7</sup> Basule' rediidxre lojreni te rut gucuaquijdireni. <sup>8</sup> Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, beñguijdxru najcni lo rebejñ nani di chalilajz xtidx Dios.

<sup>9</sup> Di gucuaalu laj rebiuud lo guijtz te gacnäjtuni palga gajdni chu gayojñ ijz. Riäjłza gac biuudga te gunaa ni gubaññäsa'c chäälñi. <sup>10</sup> Riäjłza gum-bee bejñni xcuent redzunsa'c ni rujñni; palga baslaani rexi'nni, palga badedlaani rolijzni gues beñ zijt, palga gudiibni ni' rexpejñ Dios te si'c guzeñ xcälñadolajzni, palga racnäjni reni rdejd trabajw, palgaza riuni rujñni guira'ti redzunsa'c.

<sup>11</sup> Niluxh na'c gucuaalu laj biuud ni yu' guxiiru ijz sa'csi che guichaglajzreni te niguii, siällajzreni diidx ni bia'nreni lo Jesucrist, te rłajzni guchñasacreni. <sup>12</sup> Dxejc siu'reni neñ dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. <sup>13</sup> Dxejc sia' lojreni xhet gundireni, rijreni rolijz bejñ ricuereni. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni. <sup>14</sup> Ni'cni rłazä rebiuud ni najc dxa'pru guchñaareni stehuält, chu xi'nreni, fisa'creni rolijzreni te na'c guiniyajreni rebejñ ni rdxe'ch lojnu. <sup>15</sup> Sa'csi yu' gaii biuud ni alagubicaj lo xnez Dios sanajlreni beñdxab.

<sup>16</sup> Pal yu' tej resa'nu ni najc sa'ni te biuud, riäjł gacnäjnini, na'c gusaanni gutajłni xtzuun guidoo, te si'c guidoo sajc gacnäj rebiuud ni rquinpac chu gacnäjreni.



17 Rebenḡool ni rnibesa'c guidoo, riäjł chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxa'creni la'tu con xtidx Dios. 18 Sa'csi lo xtidx Dios caj scree: “Na'c gusällu guiixh ro' gon che rusiani triuu”; si'cza caj stee diidx: “Riäjł gax bejn ni rujn dzuun.”

19 Na'c cucuadiajglu xtidx tej ni rucuaquij te benḡool palga ruti tio'p, choḡ testiigw. 20 Niluxh reni sanuu rujntis dojl, riäjł gulijdxlureni nez loj rebenḡ guidoo, te näjza laareni guidxejbreni. 21 Nez loj Dios, nez loj Dad Jesucrist, nez lojza reangl ni gule Dios, rulidxduxhälü chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn. 22 Na'c gusiojb lajzlu gusujlu naalu yejc te bejn, te gacni beḡ guidoo palga gajdni guisieed guibaḡsa'cni lo xnez Dios sa'csi lagajc yejclu jiajb rextojłni. Gubicaj lo guiraa dolḡuijdx.

23 Na'cru yälü ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

24 Yu' bejn ruzenḡajc rextojłni ni'c rajcni castiigw, niluxh yu' bejn ni di xtojłni guzenḡajc. 25 Sigajcsa redzunsa'c ni rujn bejn; yu'reni ruzenḡajc, niluxh mase dini guzenḡajc, digacdi jianxhiga'tzni, sidzujḡ dxej suzenḡni.

## 6

1 Reni najc mos riäjł cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. 2 Palga yu' remos ni najc xlamni te nani rlilajz, na'c cuälazreni rextiidxni sa'csi najcni bejtzni lo xcälrililajz Jesucrist. Riäjł gunsa'crueni xtzuunni, sa'csi najcreni sa'ni

loj yälrlilajz xten Dios, luxh sanälajzzarenini. Rediidxre baluii, basule'.

*Yäl̄nabaṅsa'c näjza te lastoo ni rbedxi*

<sup>3</sup> Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibaṅsa'c bejn, <sup>4</sup> bejnga rlajz guiliä'p lagajc xpala'nni, niluxh xhet näjn-dini. Si'c te yäl̄guijdx yu'tis yejcnı yäl̄guiniab diidx, yäl̄rdiidx. Luxh redee rujn rdxe'ch lajzreni, rujni rdxe'ch bejn lo sa'ni, rujni rniyaj bejn, rujnzani di bejn guinisa'c lo sa'ni. <sup>5</sup> Rujnzani rdilnäj bejn sa'ni. Guiraa redee gun bejn ni aguxhij̄n xcäriejnı, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. <sup>6</sup> Niluxh yäl̄nabaṅsa'c näjza te lastoo ni rebedxi, redee sa'cduxh. <sup>7</sup> Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. <sup>8</sup> Niluxh palga rajpnu xhi gaunu, xhi gajcwnu, con ni'c riäj̄l̄ guibalaaznu. <sup>9</sup> Niluxh reni rlajz ga'p xhidalduxh meel, riajbreni lo xhigab guijdx, rujnzarenı xhidajl̄ dzuun ni xhet sajcdi, ni rujn daan, ni rusiääz bejn lo yäl̄ruxhiṅ, lo yäl̄rnitloj. <sup>10</sup> Sa'csi yäl̄rinälajzni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanrenı xcäl̄rlilajz Dios, dxejc lagajc laarenı rujn rdedduxhrenı trabajw.

*Dzun-huen xten yäl̄rlilajz*

<sup>11</sup> Niluxh luj, bejn xten Dios, baxu'ṅ lo guiraa dee, te chanuulu lo xcäl̄xhigabsa'clu näjza yäl̄nabaṅsa'clu; te chanajllu yäl̄rlilajz näjza yäl̄sanälajz; te chanuulu lo yäl̄rbecdxi lajz näjza yäl̄nadolajz. <sup>12</sup> Benduxh dzuun xcuent yäl̄rlilajz

Jesucrist, gunazdzu'tz yäl**nabaj**n ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. <sup>13</sup> Naj rulidxälu nez loj Dios ni rudeed yäl**nabaj**n lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, <sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jääd Xtrad Jesucristnu. <sup>15</sup> Sidzujn dxejga nani agunii Dios guidzujnmi. Dios ni najc le' sujn scree sa'csi laatisni najc Dios, najcni reii xten rereii, rnibeezani reni rnibee. <sup>16</sup> Laatisni dini guet, nabajnni lo bianij cadro rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäjł ga'p rebejn xpala'nni. Laani rajp yäl**rnibee** par tejpas. Sugacni si'c.

<sup>17</sup> Baliidx reni rajp xhidajl xhixtenni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajn, ni runiidx loonu guiralii xhixtennu ni rquiinnu te guibalajznu. <sup>18</sup> Baliidxreni gunreni dzunsa'c, gundajnreni dzunsa'c, gacnäjreni reni xhet rajpdi, cuenäsa'creni sa'reni. <sup>19</sup> Si'c ga'preni yäl**nas**a'c ni guzudzu'tzreni che jääd Jesucrist, te guiniaztzu'tzreni yäl**nabaj**n par tejpas.

### *Rulijdxni Timoteu*

<sup>20</sup> Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl**naj**n'. <sup>21</sup> Sa'csi yu' reni sanuu yäl**naj**nre ni'c banijtreni lo Dios xcuent yäl**rililaj**z. Gacnäj Dios luj. Sugacni si'c.

**Xtidxcoob Dios ni biädinä dad Jesucrist  
New Testament in Zapotec, Mitla (MX:zaw:Zapotec,  
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

5cff1274-8dc3-5398-a94d-f6033bb363c9